



ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ
ՇՆՈՐՀԱՎՈՐԱԿԱՆ ԳԻՐԸ ԱՄԱՆՈՐԻ ԵՎ ՍՈՒՐԲ ԾՆՆԴՅԱՆ
ՏՈՆԵՐԻ ԱՌԹԻՎ՝ ՈՒՂՂՎԱԾ ՀԱՅԱՍՏԱՆՅԱՅՑ ԵԿԵՂԵՑՈՒ
ՆՎԻՐԱՊԵՏԱԿԱՆ ԵՐԵՔ ԱԹՈՌՆԵՐԻՆ, ԹԵՄԱԿԱԼ ԲՈԼՈՐ
ԱՌԱՋՆՈՐԴՆԵՐԻՆ ԵՎ ԵԿԵՂԵՑԱԿԱՆ ՀԱՄԱՅՆՔՆԵՐԻՆ

Նոր Տարվո լուսաբացը վերստին բերում է Հայոց հուսացյալ աշխարհին՝
մեծ ավետիսը Փրկչին մեր Հիսուսի Սուրբ Ծննդյան և երկնային պատգամը
հրեշտակաց՝ «յերկիր խաղաղութիւն, ի մարդիկ հաճութիւն»:

Սույն Աստվածառաք ավետիսով ողջունում ենք Ձեզ սրտանց և մաղթում
Ձերդ Սրբության երկնատուր ամեն բարիք ու արեշատ բազում տարիներ՝
շարունակելու Ձեր նվիրական առաքելությունն ի պայծառություն Ձեր սուրբ
Աթոռին և Ձեր եկեղեցյաց:

Առաքում ենք նաև Մեր հայրական սերն ու օրհնությունը Ձեր բարե-
պաշտ ժողովուրդյան և սուրբ Աթոռիդ ուխտապահ միաբանության, աղոթքով
սրտաբուխ, որ բոլորը ձեռք-ձեռքի տված համերաշխ գործակցությամբ շեն
և պայծառ պահպանեն Ձեր աղոթքի Տուները և միշտ բարձր պահեն սուրբ
անունը մեր Առաքելական Մայր եկեղեցու:

«Քրիստոս ծնաւ և յայտնեցաւ, ձեզ և մեզ մեծ ավետիս». ամէն:

ՎԱԶԳԵՆ Ա

ԾԱՅՐԱԳՈՒՅՆ ՊԱՏՐԻԱՐԷ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ

Ս. Էջմիածին

* * *

Ամանորի և Սուրբ Ծննդյան տոների առթիվ Ամենայն Հայոց Վեհա-
փառ Հայրապետի անունով ստացվեցին ամենաջերմ և հարգալից զգաց-
մունքներով զեղուն բազմաթիվ շնորհավորական հեռագրեր և նամակներ
մեր նվիրապետական երեք Աթոռների գահակալներից, արտասահմանի և
ներքին բոլոր թեմերի առաջնորդներից, ազգային-եկեղեցական, մշակու-
թային, հայրենակցական, տիկնանց, օրհորդաց և երիտասարդաց զանա-
զան կազմակերպություններից, հայ և օտար պաշտոնական անձնավորու-
թյուններից:

Հանուն Հայոց Հայրապետի ջերմ շնորհակալություն ենք հայտնում
ստացված պատասխան շնորհավորականների համար:

